

四明石芝法師樂邦文類

孝養父母唯在命終助往

勸孝文曰：父母信知念佛，蓮華種植時也；一心念佛，蓮華出水時也；念佛功成，華開見佛時也。孝子察其往生時至，預以父母平生眾善，聚爲一疏，時時讀之，令生歡喜。又請父母坐臥向西，不忘淨土，設彌陀像，然香鳴磬，念佛不絕。捨報之時，更須用意，無以哀哭，失其正念。父母得生淨土，受諸快樂，豈不嘉哉！平生孝養，正在此時，寄語孝子順孫，無忘此事。

龍舒居士淨土文

勸孝子

長蘆蹟禪師，作勸孝文百二十篇。前百篇，言奉養甘旨，爲世間之孝，後二十篇，言勸父母修淨土，爲出世間之孝。蓋世間之孝，一世而止，猶爲孝之小者，出世間之孝，無時而盡。以父母生淨土，福壽不止，如恆河沙劫，此莫大